

Ilageeqarneq pillugu Inatsisartut inatsisissaattut siunnersuut**pillugu****Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap****ISUMALIUTISSIISSUTAA****Siunnersuutip aappassaaneerneqarnerani saqqummiunneqartoq**

Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap suliarinninnermini makkuninnga inuttaqarpoq:

Harald Bianco, Inuit Ataqtigiit

Debora Kleist, Inuit Ataqtigiit

Andreas Uldum, Demokraatit

Malik Berthelsen, Siumut

Knud Kristiansen, Atassut

UPA10-mi ulloq 14. april 2010-mi siullermeerinerup kingorna siunnersuut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap misissorpaa.

Siunnersuutip imarisaa

Suliassaqarfik pillugu maanna inatsisaasumi ilageeqarnikkut allaffissornikkullu suliassat naapertuutinngitsumik immikkoortinneqarsimapput. Allaffissornikkut ilageeqarnikkullu suliassat immikkoortinneqarnerat Naalakkersuisunut, Ilageeqarnermi atorfilinnut, Ilagiinni soqutigisaqartunut pingaartumillu Biskoppimut ilageeqarnermut sulianik nakkutilliisumut killiliisutut misinnarpoq. Suliassat amerlasuut allaffissornermut ilageeqarnermullu tunngasuupput, tamatuma kingunerulugu allaffissornikkut ilageeqarnikkullu suliassat arlallit nalorninarpoq, tassa akisussaaffinnut oqartussaaffinnullu tunngasut ersarinngimmata.

Kiisalu naalackersuineramik ingerlatsinerup ilagiinnillu ingerlatsinerup ersarissumik avissaartinneqarnissaat naalackersuineramik suliaqartunit sivisuumik kissaatigineqarsimavoq.

Inatsit akuerineqarpat ilagiit aqqissuussaananerarsarinnerujussuanngorlunilu ilagiit imminut aqunnerulissapput. Tamanna allaffissornikkut suliassat arlalippassuit maannamut Naalakkersuisunit isumagineqarsimasut biskoppimut tunniunnerisigut pissaaq.

Ataatsimiititaliap siunnersuummik suliarinninnera

Siunnersuut partiinit tamanit taparserneqartoq aammalu inatsisissatut siunnersuut sivisuumik utaqqineqarsimasoq ataatsimiititaliamit oqaatigineqassaaq.

Ataatsimiinnerit

Ataatsimiititaliap suliarinninnerminut atatillugu biskoppi Sofie Petersen ulloq 19. november 2009-mi ataatsimeeqatigaa. Kiisalu Ilagiit pillugit Naalackersuisut ulloq 23. martsimit 24. martsimut 2010 isumasioqatigiissitsineranni peqataalluni.

Siunnersuutip tusarniaassutiginer

Siunnersuut ulloq 3. junimit 8. julimut 2008 tusarniaassutigineqarpoq, piffissaritinneqartorlu sivikippallaangajattutut nalilerneqarsinnaavoq, tassa akissuteqarnissamut killigitinneqartoq aasaanerani sulinngiffeqarnissamut qanittuararsuanngorlugu inissineqarsimammat.

Provsteqarfinni ataatsimiititaliat atorunnaarsinneqarnissaat biskoppimit eqqarsarnartoqartinneqartoq ataatsimiititaliap maluginiarpaat, tassa provstit pingasut namminneq immikkut aningaasaqarlutik toqqaannangitsumik vice-biskoppinngortinneqassammata, tamannalu ilagiit nakkutilliinerata pisariunerulerneranik kinguneqarsinnaasoq biskoppi isumaqarmat. Aammattaaq biskoppi allappoq provsteqarfinni ataatsimiititaliat atorunnaarsinneqarnissaat aalajangiusimaneqarpat biskoppip aqutsisoqarfiata § 8-mut ilanngunneqarnissaa aalajangiisuusumik pingaaruteqartutut isigineqartoq.

Provsteqarfinni ataatsimiititaliat atorunnaarsinneqarnissaat Naalackersuisut aalajangiusimaneqarpoq oqaatigineqarlunilu biskoppip oqartussaaffii inatsimmut nalinginnaasumik nassuiaatini allassimasut, taamaattumillu biskoppip aqutsisoqarfiata § 8-mut ilanngunneqannginnissaa Naalackersuisunit toqqarneqarsimalluni.

Naalackersuisut aalajangernerat ataatsimiititaliamit tusaatissatut tiguneqarpoq, kissaatigaluguli siunnersuutip aappassaaneernejarnerani aalajangiineq itisilerneqassasoq.

Ilagiit aningaasaqarnerat

Aningaasanut inatsimmut sanilliullugu siunnersuut aningaasartuutaassanngilaq. Taamaappoq allaffissornikkut suliassat tunniunneqarnerannut peqatigitillugu suliassaqarfimmut kontot aamma ilagiinnut tunniunneqassammata. Kontot makku pineqartut Naalackersuisut paasissutissiipput:

- Konto pingaarneq 40.92.14, Ajoqissanik organistinillu ilinniartitsineq, 2010-mi 1,791 mio. kr.-it missingersuutigineqarlutik

- Konto pingaarneq 40.92.15, Ilagiit højskolia, 2010-mi 1,51 mio. kr.-it missingersuutigineqarlutik
- Konto pingaarneq 40.97.01, Biskoppip allaffia, 2010-mi 2,984 mio. kr.-it missingersuutigineqarlutik
- Konto pingaarneq 45.97.02, Danmarkimi ilagiinnik sullissineq, 2010-mi 1,082 mio. kr.-it missingersuutigineqarlutik
- Konto pingaarneq 40.97.03, Kalaallit Nunaanni Ilagiit, 2010-mi 40,867 mio. kr.-it missingersuutigineqarlutik

Qaanaap sullinneqarneranut akisussaannerup Qeqqata, Qaanaap Tunullu provsteqarfianniit Avannaata provsteqarfianut nuunneqarnissaanut atatillugu provsteqarfiit akornanni aningaasat agguarnerat nalileqqinneqassasut Naalakkersuisut oqaatigaat. Kiisalu biskoppimit provsteqarfinnut aningaasanik nuussisoqarsinnaavoq.

Siuliani allassimasut malillugit ataatsimiititaliap paasinninnera imaappoq inatsit akuerineqarpat kontot taakku – aningaasartaat allanngornagit – ilagiinnut Naalakkersuisunit nuunneqalersaartut, tamatumani nussuisoqarsinnaalluni- Aningaasatigut nussuinerit qanoq ittut ingerlanneqarnissaat pillugu ilisimatinneqarnissani ataatsimiititaliap qinnutigaa.

Inassuteqaat

Siuliani oqaatigineqartut siunnersuummillu siullermeerinermi oqaaserineqartut tunngavigalugit siunnersuut **akuerineqassasoq ataatsimiititaliamit isumaqatigiittumit inassutigineqarpoq.**

Taama oqaaseqarluni ataatsimiititaliap siunnersuut aappassaaniigassanngortippaa.

Harald Bianco

Debora Kleist

Andreas Uldum

Malik Berthelsen

Knud Kristiansen